

## Op Är Stëmm kënnt et un!



Dir wëllt keen Europa, dat sech ëmmer méi breitmécht an ëmmer méi Kompetenzen un sich zitt, ouni grondsätzlech Problemer wéi d'Aarbechtslosegkeet an déi sozial Ongerechtegkeeten ze léisen. Dir wëllt e Lëtzebuerg, dat och muer nach selwer däréif bestëmmen, wéi a wéini den Index ausbezuelt gëtt, wéi eis Sozialversécherung organiséiert gëtt, mat wéi enger economescher Grondlag mir eis Zukunft a sozial Cohesioun erhalen a wéi eng Sprooch am Land däréif geschwat ginn.

Dowéinst kënnt et den 25. Mee op Är Stëmm un: d'ADR, an nëmmen d'ADR, steet riicht fir manner Europa a méi Lëtzebuerg.

Déi véier Parteien, déi bis elo Lëtzebuerg am Europaparlament vertrauden hunn, wëllen de Géigendeel: méi Europa a manner Lëtzebuerg!

Ee vun de Spätzekandidate fir d'Presidentschaft vun der Europäescher Kommissioun hat schonns vill Responsabilitéiten an Europa. Mee obschonns e Lëtzebuerg ass, huet de Jean-Claude Juncker vill Kompromësser akzeptéiert, ënnert deenen eis national Economie gelidden huet. Ee Beispill, dat mer geschwënn all an eise Portemonni wäerte spieren: den Ausfall vun der TVA um elektronische Commerce, deen elo duerch eng TVA-Erhéijung fir jiddereen ausgeglach gëtt.

Déi véier Parteien steieren op e federaalt Europa

- also en europäesche Staat - zou, d'Piraterpartei huet zumindest de Courage fir sech duerzou offiziell ze bekennen. D'ADR ass géint e federaalt Europa, an deem d'Kompetenzen an d'Responsabilitéiten ëmmer méi wäit vum Bierger verlagert ginn. D'ADR ass fir en Europa vun den Natiounen, mam néidege Respekt virun den eenzelne Memberstaten – och Lëtzebuerg – esou wéi et vun de Päpp vun Europa virgesi war.

Wéi virun all Europawalen an der Vergaangenheet, esou virspriechen och dës Kéier d'Parteien, déi um Rudder waren, erëm méi Demokratie, méi Transparenz, méi e soziaalt Europa. No de Wale ginn dës Versprieche vergiess. D'Resultat ass bekannt: ëmmer manner Europäer gi wielen, et gëtt ëmmer méi däischter an der Donkelkammer an d'Aarbechtslosegkeet an Europa – besonnesch de Jugendchômage – stellt d'sozial Cohesioun um Kontinent virun eng enorm Erausforderung.

Net wielen oder wäiss wielen ass keng Léisung a passt deenen an de Krom, déi um Rudder sinn. Wien eppes wëllt änneren, muss anescht wielen. Wann dir wëllt, datt déi legitim Interessie vu Lëtzebuerg op der europäescher Bühn konsequent vertraude ginn, da loosst Är Stëmm net verluer goen.

Fir eng aner Sprooch fir a vu Lëtzebuerg an Europa: ADR, Lëscht 4!

### Walversammlungen

Kommt an diskutéiert mat eise Kandidaten!  
Eis Informatiounsversammlunge fänken um **20 Auer** un.

**19. Mee**

#### Esch-Lalleng

Hall Omnisports  
Henri Schmitz  
Bvd Hubert Clement

**20. Mee\***

#### Hesper

Centre Nicolas Braun  
474, route de Thionville

**21. Mee**

#### Bech-Maacher

Possenhaus  
Keeseschgaessel

**22. Mee**

#### Ettelbréck

Däichhal (1. Stack)  
Rue du Deich

\*Dës Walversammlung fänkt ausnamswies um 19.30 Auer un.

L'ensemble des articles parus dans cette publication sont disponibles en français sur le site internet [www.adr.lu](http://www.adr.lu)

All the articles in this publication are available in English on the website [www.adr.lu](http://www.adr.lu)

Todos os artigos desta publicação estão disponíveis em português no site [www.adr.lu](http://www.adr.lu)

All Stëmm fir d'CSV ass eng Stëmm fir d'Ausländerwalrecht.....	2
Manner Europa, méi Lëtzebuerg: dräi konkret Beispiller.....	3
Géint en EU-Bäitritt vun der Tierkei.....	3
Gricheland an Euro-Rettung: nach laang net iwwert de Blerg.....	4
TTIP: de „Jo, mä...“ vun der ADR.....	4
Lëtzebuergesch = offiziell EU-Sprooch.....	5
Visioun vum Tram fir Absurdistan.....	5
Wëll de JCJ wierklech President ginn?.....	6
EU-Agrarpolitik: keng gutt Bilanz.....	7



# Firwat eng Stëmm fir d'CSV eng Stëmm fir d'Ausländerwahlrecht ass!

Scho virun de Chamberwalen huet d'ADR drop opmierksam gemaach, datt d'CSV, wat d'Ausländerwahlrecht ugeet, en duebelt Spill spillt. An och virun den Europawale probéiert si nees ze maachen, wéi wann se dogéint wier, an dat obwuel all Stëmm fir d'CSV eng Sëmm fir d'Ausländerwahlrecht ass!

Zur Erënnerung: Déi zoustänneg Chambercommissioun schafft scho méi laang un enger neier Verfassung, iwwert déi (falls d'Dräiercoalitioun sech un hiert Versprechen hält) d'Bierger kënnen an zwee Joer per Referendum decidéieren. Virun de leschte Chamberwalen hunn d'Parteien an deem Kontext iwwert eng d'Aféierung vum Ausländerwahlrecht bei de Chamberwalen diskutéiert. Den Artikel 52 vum aktuelle Verfassungstext gesäit vir, datt ee muss Lëtzebuerger si fir matbestimmen ze kënnen, wien an d'Parlement kënnt („Pour être électeur, il faut être Luxembourgeois ou Luxembourgeoise“). D'CSV huet deemools proposéiert, deen Artikel einfach ze sträichen an duerch eng méi allgemeng Dispositioun ze ersetzen. Den neien Text, dee vun der CSV virgeschloe gouf an dee vun alle Parteien - mat Ausnam vun der ADR - guttgeheescht gouf, huet als Konsequenz, datt d'Chamber kéint iwwert e Gesetz d'Ausländerwahlrecht aféieren.

**Wann ee wierklech géint d'Ausländerwahlrecht ass, esou wéi d'CSV et neierdénge behaupt, da muss een och dofir sinn, datt déi Dispositioun do bleift, wou se higéiert: an d'Verfassung!**

## „Richter verwehren EU-Ausländern Wahlrecht“

Ënnert deem Titel konnt een de 24. März, also virun 2 Méint en Artikel op der Internetsäit vun der däitscher Zeitung *Die Zeit* liesen. Hei en Zitat aus dem Text, deen all d'Verdeedeger vum Ausländerwahlrecht (déi dacks net zécke fir der ADR Friemefeindlechkeet virzegeheien, well se selwer keng valabel Argument hunn) sollte liesen:

„Der Bremer Staatsgerichtshof hat entschieden, dass das Wahlrecht nicht ausgeweitet werden darf. Zum Volk – und damit zum Wahlvolk – zählten nur deutsche Staatsangehörige.“

In Bremen werden EU-Ausländer bei Landtagswahlen auch künftig nicht wählen können. Der Staatsgerichtshof des kleinsten Bundeslandes lehnte das Vorhaben zur Änderung des Wahlrechts der Bürgerschaft ab. Das Grundgesetz bestimme, dass zum Volk und damit zum Wahlvolk nur die deutschen Staatsangehörigen zählen, begründete der Staatsgerichtshof das Urteil.“



Wéi d'ADR sech als eenzeg Partei géint d'Ausländerwahlrecht ausgeschwat huet, dunn huet d'CSV ganz séier d'Kéier geholl a behaupt, si wier och dogéint. Méi wéi eng Kéier huet een sech missen unhéieren, d'CSV wier an enger éischer Phase fir d'Ausländerwahlrecht gewiescht, well se e Kompromëss mam Coalitiounspartner LSAP agaange wier - e Kompromëss, un deem si sech zënter de leschte Chamberwalen net méi gebonne fillt.

Dëst ass den Ënnerscheid tëscht enger CSV, déi bei enger esou wichtiger Fro kapituléiert, an der ADR, fir déi d'Weiderbestoe vun der Lëtzebuerger Nationalitéit als Kritär fir bei de Chamberwale wielen ze goen net verhandelbar ass!

**Elo, wou d'Europawale virun der Dier stinn, hält d'CSV nach ëmmer net mat hirem duebele Spill op, mä mécht monter weider!**

Méi wéi ee Kandidat vun der CSV-Lëscht huet sech op öffentlechen Tables rondes FIR d'Ausländerwahlrecht ausgeschwat. Oft hunn se ënnerstrach, et géif sech ëm eng „perséinlech Meenung“ handeln. Et ass selbstverständlech hiert gutt Recht, mä muss de Wieler dann elo bei all eenzelne CSV-Kandidat nofroen goen, ob hien zu deem steet, wat am Walprogramm virgesinn ass, oder ob hien zu anere Punkten och eng „perséinlech Meenung“ huet?

**Dobäi kënnt, datt d'CSV an deem Dossier fir eng europäesch Léisung ass. Am Kloertext: Si wëll sech dofir asetzen, datt an der ganzer EU d'Ausländerwahlrecht fir d'Nationalwalen ageféiert gëtt, esou wéi et och schonns bei den Europa- a bei de Gemengewalen de Fall war.**

**All Stëmm fir d'CSV ass also a Wierklechkeet eng Stëmm fir d'Ausländerwahlrecht bei de Chamberwalen!**

**D'Positioun vun der ADR kéint net méi däitlech sinn: d'EU huet an deem Dossier absolut näischt ze soen!**

Mat der Aféierung vum Ausländerwahlrecht fir d'Nationalwale géif d'EU sech schon nees an d'Souveränitéit vun de Memberstaaten amëschen!

**Zu Lëtzebuerg trëtt d'ADR weiderhin dofir an, datt d'Lëtzebuerger iwwert de Wee vun engem Referendum zu deem wichtige Sujet gefrot ginn (an datt hir Meenung och respektéiert gëtt). Um europäeschen Niveau wëll d'ADR dofir suergen, datt et net zu enger Vertragsännerung kënnt, duerch déi Lëtzebuerg forcéiert wier den Ausländer d'Wahlrecht fir d'Chamberwalen ze accordéieren!**

**All Stëmm fir d'ADR ass eng Stëmm fir de Respekt vun der nationaler Souveränitéit!**



# Manner Europa, méi Lëtzebuerg: dräi konkret Beispiller

D'ADR wëllt manner Europa, well Europa sech a Saachen amëscht, wou se keng Kompetenze vun den nationale Staaten iwwerdroen krut an déi awer direkt Awierkungen op de Bierger hunn. Et ginn dofir vill negativ Beispiller.

## ■ Kee genmanipuléierte Mais



Kaum en Europäer a kee Lëtzebuerg wëllt Popcorn aus genmanipuléiertem Mais, an och keng Hénger, déi mat dësem Fuddermittel gefiddert sinn. Eng Majoritéit vun de Memberstaaten, 19 Länner vun 28, deelt dës Meenung. An dach! Mëtt Februar 2014, e puer Woche virun den Europawalen, huet Europa d'Uplanze vum genmanipuléierte Mais TC 1507 erlaabt. Lobbye bestëmme mat an de Prinzip vun der „qualifizierter Majoritéit“ féiert an der Brüsseler Donkelkammer zu onqualifizierten Decisiounen.

D'ADR steet fir eng gemeinsam Agrarpolitik, déi manner op déi grouss Lobbye lauschert a fir en Europa, dat sech manner drëms bekëmmert, wat op eis Tellere kënn. Dofir brauche mer e Lëtzebuerg, wat op nationalem

Plang méi Verantwortung iwwerhëlt an an eegener Kompetenz bestëmmt, wéi sécher eis Liewensmëttel sinn. Mir brauche méi Lëtzebuerg fir eise Baueren ze erlaben, gutt Qualitéit zu faire Präisser ze liwweren.

## ■ Hauséieren, nee Merci !

Duerch e Gesetz vum 1. Januar 1850 hat de Kinnek - Groussherzog Wëllem III d'Hauséieren zu Lëtzebuerg verbueden. Nozeliesen am Memorial Nummer 4 aus dem Joer 1850: „Vom 1. Januar 1850 an ist im ganzen Großherzogtum aller Hausierhandel in den Straßen, den Wirths- und Privathäusern verboten ...“

D'Lëtzebuerg sinn domadder 164 Joer gutt gefuer. Et konnt, bis virun e puer Wochen, keen un Är Dier schelle kommen, fir lech Teppecher, Zeitungsabonnemeter oder soss eppes unzedeinen. Abee, Europa huet Lëtzebuerg gezwongen, dës al a gutt Gesetzgebung opzeginn! D'EU-Direktive 2011/83/UE mécht d'Hausdieren zu Lëtzebuerg op, fir éierlech a vläicht manner éierlech Händler, déi hir Wueren a Kontrakter dierfen esou ubidden. Ob do d'Pechbild „Colportage Nee Merci!“ (wat dann elo nieft dem Autocollant „Keng Reklamme weg“ dierf gepecht ginn) wierklech eppes hëlleft? 55 vu 60 Deputéierten hunn, den 11. März, fir dëst Gesetz a géint de Bierger gestëmmt!

D'ADR seet Stop! Europa huet lech net ze soen, wem der Är Hausdier sollt opmaachen! D'ADR steet fir méi Lëtzebuerg, dat als Land d'Recht muss behalen, seng Bierger virun esou Praktiken ze schützen.



## ■ Energiespuerluuchten: firwat den Zwang?



Spueren ass richtig, an dëst gëllt och, wann et ëm de Stroum geet. D'Industrie bitt fir d'Luuchten eng ganz Palette vu flotte Léisungen. Mä mussen dowéinst Zwangsmoosname vu Bréssel agefouert ginn? D'Reglement (CE) 244/2009 gesäit vir, dat tëscht 2009 an 2016, jee no der elektrescher Leeschtung, dem Edison seng Glühbire ganz MUSSE verschwannen.

Den Zwang vu Bréssel huet gravéierend Nodeeler: den Text vum europäesche Règlement kënnt net derlaanscht, fir op de gëftege Quecksëlwer anzegoen. Op eng parlamentaresch Fro vun der ADR (QP 2318) huet och de Lëtzebuerg Gesondheitsminister missen zouginn, dat wann eng vun de moderne Luuchte brécht, bis zu 5 Milligramm Quecksëlwer fräigesat ginn. De Minister weist och nach drop hin, dat esou Luuchten an d'Kategorie vun de geféierlechen Offäll falen an nëmmen an d'Superdreckschést gehéieren.

Och wéinst esou fir d'Gesondheet geféierlech Reglementer, brauche mer manner Europa a méi Lëtzebuerg; e Lëtzebuerg, dat kann an dierf Decisiounen huelen fir op dem Bierger seng Bedierfnesser anzegoen.

# Géint en EU-Bäitritt vun der Tierkei!

D'ADR ass am Géigesaz zu den anere Parteie prinzipiell géint e Bäitritt vun der Tierkei an d'EU, well se geographesch a kulturell net zu Europa gehéiert.

D'lescht Joer hunn sech d'EU-Ausseministeren drop geeenegt, fir an de Bäitrittsverhandlung mat der Tierkei en neit Kapitel opzemaachen. D'Lëtzebuerg Coalitiounsparteien hunn och hiren Accord ginn, obwuel sech mëttlerweil eng Rei Kandidat wéinst den Europawalen op eemol vill méi virsichteg ausdrécken.

Et kéint ee bal mengen, déi aner Parteien hätten elo eréischt entdeckt, wéi prekär d'Menscherechtssituatioun an der Tierkei ass. Deslescht konnten d'Awunner net méi op déi sozial Medien zougräifen, fir do hir Meenung ze äusseren. Dëst ass just ee Beispill vu villen!

D'ADR huet sech ëmmer dofir ausgeschwat, dat d'Bäitrittsverhandlung gestoppt ginn. Et sief drun erënnert, dat d'Tierkei nach ëmmer net hir Engagement geigeniwwer Zypern a geigeniwwer der EU, besonnesch wat d'Kontroll vun der Immigratioun ugeet, respektéiert. D'EU verléiert international Credibilitéit, wann se grad elo, wou d'Menscherechtssituatioun an der Tierkei besonnesch schwierig ass, iwwerhaupt en EU-Bäitritt als méiglech ugesäit. D'ADR ass allerdéngs der Meenung, dat en Assoziéierungsofkommes déi bescht Léisung duerstellt.

D'ADR verlaangt, dat zu Lëtzebuerg iwwert all Ratifizéierung vun engem neien EU-Bäitritt per Referendum decidéiert gëtt!

Mir mussen och an europäesche Froen endlech méi Demokratie woen!





# Griicheland an Euro-Rettung: nach laang net iwwert de Bierg!

„Ist Griechenland über den Berg?“, freet den Tagesspiegel. Schéi wär et! Griicheland mell nees en Iwwerschoss bei de Recettë vum Staat. A virun den Europawale ginn et schonns euphoresch Téin vum Kommissär zu Bréissel: „Dies spiegelt den bemerkenswerten Fortschritt wider, den Griechenland bei der Reparatur seiner öffentliche Finanzen seit 2010 gemacht hat“.

De Spiegel huet zwee Mol gekuckt: „Die trügerische Euphorie in der Euro-Krise“. E Boni



am Budget vu Griicheland? Jo mä... nëmme, wann een d'Zënsen an d'Hëllef vun de Banken net mat arechent. A Wierklechkeet huet d'Land um Mëttelmier e Staatsdefizit an der Héicht vun 12,7% vum PIB. 3% si laut de Kritäre vum Maastricht erlaabt! De Staatsdefizit ass op 175,1% vum PIB gewuess.

Gëtt also den europäesche Bierger, grad ewéi den Awunner aus Griicheland, eng zweete Kéier bei d'Lisa Løkke Rasmussen gelooss? Nëmme duerch falsch Zuelen, déi awer den Acteure wéi engem Jean-Claude Juncker bekannt waren, konnt Griicheland iwwerhaupt Member an der Eurozone ginn. De Präis, dee fir dës Lige bezuelt ginn ass, bezuelt gëtt an nach bezuelt muss ginn, ass ganz héich.

Vu bilateralem Prêt iwwert Garantien an Abezuelungen a Rettungsschiermer an international Fongen: de Lëtzebuerger Steierzueler ass net nëmme dobäi, e steet esouguer ganz vir, wat säi Bäitrag pro Kapp ugeet.

Dës Solidaritéit kéint een akzeptéieren, wann d'Hëllef dann do géif ukommen, wou se gebraucht gëtt: bei de Griichen. A Wierklechkeet hunn déi ganz vill Suen, déi fléissen, an der Haaptsaach déi däitsch Banke gerett!

Et ass dat griichescht Vollek, dat den héchste Präis fir eng falsch Politik vun der Eurozon bezilt. D'Griichen hunn en Drëttel vun hirer Kafkraaft agebéisst, de Chômage ass ëm 160% an d'Luucht gaangen a 6 vun 10 Jugendlecher sinn am Chômage. Ganz schlëmm ass et, dat 800 000 Leit sech keng Krankekees, Behandlung a Medikamenter kënne leeschten. En Deel vun Europa gëtt nees zum Drëttweltstaat: a Griicheland ass d'Kannerstierflechkeet téschent 2008 an 2010 ëm 43% geklommen!

D'ADR proposéiert zanter Joren, dat d'Hëllef fir Griicheland gekoppelt gëtt un hiren Austrëtt aus der Eurozon. Nëmme esou kommen se zu Athen nees op hir eege Féiss. D'ADR steet och fir manner Länner an der Eurozon; Länner, déi déi néideg Wirtschaftskraaft fir en staarken Euro kënne meeschteren!

## TTIP: de „Jo, mä...“ vun der ADR

Den Transatlantesche Fräihandelsvertrage (TTIP, Transatlantic Trade and Investment Partnership) gehéiert ouni Zweifel zu de wichtege Sujeten, wou d'Partei musse virun den Europawale kloer Faarf bekennen. Et handelt sech dobäi – wéi et den Numm scho seet – ëm e Fräihandelsvertrage, dat zënter e puer Méint téschent der US-amerikanescher Regierung an der Europäescher Commissioun verhandelt gëtt.

Selbstverständlech ass et jidder Partei iwwerlooss, déi eng oder déi aner Positioun ze verrieden. D'Schwarzmolerei, déi vun den TTIP-Géigner bedriwwen gëtt, entsprécht allerdéngs einfach net der Realitéit. Et kënnt och nach dobäi, dat de grénge Spëtzekandidat behaupt, dogéint ze sinn, mä seng Partei sech an der Chamber éischer dofir ausgeschwat huet. Esou vill zur Koherenz vun de Gréngen!

D'ADR ass also dofir, dat d'Verhandlung weidergefëiert ginn an dat eng Rei Aspekter onbedéngt berécksichtigt ginn:

- Mir brauchen eng fräi Economie mat gudde Sozialstandarden. Et kann net sinn, dat duerch den TTIP Drock op d'Léin entsteet. Et muss een och oppassen, dat keng Delocalisatioun geschéien.

- D'Liewensméttelsécherheet huet fir d'ADR iewescht Prioritéit. Dëst géllt besonnesch fir d'OGMen, déi d'ADR ganz kloer refuséiert.



- Wat de sougenannten „Investor-state dispute settlement (ISDS)“ ugeet (deen et engem auslännesche Betrib ënnert gewësse Konditiounen erlaabt e Land ze verkloen), d'ADR et net zu enger Paralleljustiz kommen.

Wann dës Punkten net respektéiert ginn, da wäert et keng Zoustimmung ginn zu dësem Accord. Wann eis Wäerter an eis Standarden a Fro gestallt ginn, da géif en ADR-Europadeputéierten am EU-Parlament Nee soen.

Falls dës Forderungen respektéiert ginn, dann ass awer d'ADR der Meenung, dat am transatlanteschen Handel net nëmme eng Chance, mä och eng Noutwennegkeet läit. Do, wou et méiglech ass, sollen d'Tariffer an aner Barrieren ofgebaut ginn. Am Ament sinn

d'Prozeduren, déi d'europäesch an domadder och d'Lëtzebuerger Betriber ausféiere mussen, vill ze laang a vill ze deier!

D'ADR ass der Meenung, dat een sech op kee Fall soll komplett der Diskussioun verschléissen. Et ass grondleeënd falsch, an deem Ofkommen nëmme déi negativ Säiten ze gesinn, besonnesch well oppe Mäert och kënne eng Chance fir eis Economie duerstellen. D'EU ass souwisou net an enger economescher Situatioun, dat se och nach kéint op esou eng Geleeënheet verzichten.

D'Commissioun misst regelméisseg dem Parlament Rapport maachen an sech och mam Parlament concertéiere fir déi weider Verhandlungen.



# Lëtzebuergesch = offiziell EU-Sprooch

Et gëtt keng eenzeg Partei, déi sech méi fir d'Lëtzebuergesche Sprooch asetzt ewéi d'ADR! Si huet dozou bäigedroen, datt eis Nationalsprooch demnächst och an der Verfassung steet, an net nëmmen an engem Gesetz. Hirem Asaz wëll se um europäeschen Niveau weiderféieren. Et ass nämlech inakzeptabel, datt d'Lëtzebuergesche Sprooch déi eenzeg Nationalsprooch an der EU ass, déi net gläichzäiteg och offiziell EU-Sprooch ass. D'ADR wëll dofir kämpfen, datt d'ADR seier wéi méiglech geännert gëtt, an datt d'Lëtzebuergesche Sprooch endlech och um europäeschen Niveau déi Unerkennung kritt, déi se verdéngt!

Am Géigesaz zu deem, wat vun de Géigner vun der Lëtzebuergesche Sprooch behaupt gëtt, bedeit dat net, datt all d'Texter müssen op Lëtzebuergesch iwwersat ginn. Esou Behauptunge ginn nëmmen an d'Welt gesat, fir d'ADR mat hirem méi wéi legitimer Fuerderung ze diskreditéieren. D'Wouerecht ass, et goufe scho bei anere Sproochen (wéi z.B. bei der maltesescher oder och nach bei der irescher Sprooch) Derogatiounen accordéiert. Och d'ADR trëtt fir esou eng Léisung an: Jo zur Unerkennung vum Lëtzebuergeschen als offiziell EU-Sprooch, Nee zur sennloser Verschwendung vu Ressourcen!

Ganz konkret verlaangt d'ADR:

- datt déi wichtegst Texter (Traité iwwert de Fonctionnement vun der EU, Traité iwwert d'EU,

asw) iwwersat ginn

- datt all Bierger, deem seng Mammesprooch Lëtzebuergesch ass, sech och kann an där Sprooch un d'EU-Institutionen adresséieren

- datt d'Lëtzebuergesche Europadeputéiert sech och kënnen an hirem Mammesprooch am Europaparlament ausdrécken.



D'Wouerecht ass och, datt déi aktuell Situatioun ganz kloer an eendeiteg géint eng Rei Texter, déi a Kraaft sinn, verstéisst! Virun enger Rei Joren huet d'Europaparlament eng Resolutioun ugeholl mat ënnert anerem dësem Passage:

„Das Europäische Parlament (...) dringt darauf, daß der Grundsatz, demzufolge die Bürger der Union sich gegenüber allen europäischen Organen schriftlich und mündlich ihrer eigenen Sprache bedienen können, eingehalten werden muß; ist der Auffassung, daß das Recht eines gewählten Vertreters, in seiner Muttersprache zu sprechen und zu arbeiten, untrennbarer Bestandteil des demokratischen Rechts und seines Mandats ist“.

De Conseil (Regierungs- a Staatscheffen) huet sengersäits den 13. Juni 2005 festgehalten:

„Der Rat ist der Auffassung, dass bei den Bemühungen um mehr Bürgernähe der Union der Reichtum und die Vielfalt ihrer Sprachen stärker berücksichtigt werden müssen. Ferner ist der Rat der Ansicht, dass die Möglichkeit der Bürger, in ihren Beziehungen mit den Institutionen zusätzliche Sprachen verwenden zu können, ein wichtiger Faktor ist, wenn erreicht werden soll, dass sich die Unionsbürger mit den politischen Vorhaben der Europäischen Union stärker identifizieren.“

Wat ass esou eng Decisioun Wäert, wann se einfach net agehale gëtt? D'ADR wëll sech dofir asetzen, datt dat endlech geschitt! Déi aner Parteien hunn jorelaang bewisen, datt d'Lëtzebuergesche Sprooch hinnen egal ass!

Fir d'Unerkennung vum Lëtzebuergeschen als offiziell EU-Sprooch, wiert ADR!

## Visioun vum Tram fir Absurdistan

De Minister François Bausch an d'Buergermeeschtesch Lydie Polfer hunn eng Visioun. Si sollten dem Éierestaatsminister Jacques Santer säi Rot unhuelen a bei den Dokter goen. Lëtzebuerg brauch keen ideologeschen Tram, deen an Absurdistan féiert, iwwert eng Milliard Euroe kascht an net méi erreecht wéi eng modern Buslinn.

D'Avise vum Staatsrot an der Handelskummer – fir nëmmen dës zwee ze nennen – bestätegen: den Tram léist net de Verkéiersproblem vu Lëtzebuerg. Dee besteet doranner, datt wäit



iwwert 150 000 Salariéien, dovunner der ganz vill aus der Groussregioun, all Dag an d'Stad schaffe kommen. Do hëlleft keen Tram tèschent der Gare an der Luxexpo, genau esou wéineg wéi een tèschent der Cloche d'Or an dem Findel. Vlächthunn den Här Bausch an d'Madame Polfer – se wunnen allebéid an der Stad – et nach net matkritt: d'Staue sinn net an der Stad, mä ronderëm, wäit virun a ginn zum Deel iwwert d'Grenze vum Land eraus. Opfaangparkinger an der Stad (Cloche d'Or, Luxexpo) oder an der direkter Noperschaft (Héienhaff) léisen also net de Stau, mä riskéieren dësen ëm Kilometeren ze verlängeren!

Den Tram, sollt e géint de gesunde Mënscheverstand awer gebaut ginn, wäert d'Stad fir Joren an e grouse Chantier verwandelen. Dës Aarbechten däreffe kengesfalls virun de Gemengewale fir Onrou suergen, dowéinst pendelt den Tram bis 2017 nëmmen tèschent der Luxexpo an der Roud Bréck. Entweder bréngt en do guer a glat näischt, oder schlëmmer nach, d'Passagéier, déi z.B. aus dem Osten vum Land an d'Stad wëllen, musse wéinstens zwee Mol ëmklammen, vum Bus an den Tram an nees an

de Bus.

Den Arrêt Roud Bréck, dee fir 100 Milliounen soll gebaut ginn, dréit mat den zwee Funiculaires och net vill zur Léisung bäi. Net 10, mä nëmme 6 Zich kënne pro Stonn am Pafendall halen. Den deiere Projet bréngt also nëmmen eppes fir Passagéier aus dem Norden, déi op de Kierchberg wëllen.

Eng Tramslinn Luxexpo – Roud Bréck ass näischt méi ewéi eng Spillsaach, déi fir ganz vill Sue vum Steierzueler opgeriicht gëtt fir e puer Politiker en Denkmal ze setzen. Här Bausch, Madame Polfer: baut w.e.g. Är Spillsaach an de Beetebuerg Park. Dann hu wéinstens d'Kanner hir Freed drun.

Well Politiker wéi Bausch a Polfer blann sinn, fir all Solutiounen, déi de Verkéiersproblem wierklech kënne léisen, bleift dem Bierger nëmmen nach de Wee vum Referendum. D'ADR huet schonns eng Gesetzespropositioun dowéinst an der Chamber deponéiert. Gitt dem Referendum ëm den Tram eng Chance: ënnerscheift weider d'Petitioun 333 um Site vun der Chamber. All Ënnerschrëft zielt an hëlleft déi gréisst Feelinvestitioun vum Joerhonnert ze stoppen!

# Wëll de Jean-Claude Juncker wierklech President ginn?

Kritt d'Europäesch Commissioun mam Jean-Claude Juncker op en Neits e Lëtzebuerger President? D'Äntwert op déi Fro ass mat grousser Wahrscheinlechkeet neen, an dat ganz onofhängeg vum Walresultat vun den Europawalen. De Spëtzekandidat vun der Europäescher Vollekspartei kann nach esou dacks widderhuelen, wéi e wëll, datt hien dee Poste kritt, falls d'CSV an all hir europäesch Schwësterpartei gestärkt ginn; dat heescht nach bei wäitem net, datt dat och wouer ass!

Et stëmmt, datt sech déi europäesch Parteien dës Kéier op eng Prozedur gëeent hunn, déi op den éischte Bléck ewéi e Schrëtt a Richtung méi Demokratie ausgesäit: de Spëtzekandidat vun der europäescher Famill, déi d'Wale gewënnt, soll President vun der Europäescher Commissioun ginn.

D'Allianz vun den Europäesche Konservativen a Reformisten (AEER), andär d'ADR Memberass, huet decidéiert kee Spëtzekandidat ze noméieren, an dat aus guddem Grond. Et wier nämlech falsch, d'Europäesch Commissioun mat enger Zort Europäesch Regierung gläichzestellen. D'Bierger wënschen sech keen Zentralstaat, an deem déi eenzel Memberstaaten näischt méi ze soen hätten! Si wënschen sech héchstens eng Europäesch Commissioun, déi am Déngscht vun de Länner ass, an net permanent probéiert, sech nei Kompetenzen ze ginn!

Dobäi kënt nach, datt d'Spëtzekandidaten nëmme kënnen an hirem Land, respektiv Bezierk

- dat heescht vun enger winzeger Minoritéit EU-Bierger - gewielt ginn. De Jean-Claude Juncker steet esouguer op guer kenger Lëscht. Säin Argument: et wier Bedrug um Wieler, sech fir Europadeputéierten opstellen ze loossen an dat Mandat dann net unzehuelen. Gutt ze wëssen, datt de fréiere Premier der CSV-Spëtzekandidatin

géif President vun der Europäescher Commissioun ginn. Dofir muss een awer net d'CSV ënnerstëtzen.

Et fänkt schon domadder un, datt net d'Europäesch Parlament decidéiert, wien dee Poste kritt, mä den Europäesche Conseil (dat heescht d'Staats- a Regierungschef). Am Vertrag vu Lissabon steet, datt si bei hirem Choix mussen op d'Walresultat Récksicht huelen. Dës Formulatioun ass esou vague, datt se eigentlech kann an all Richtung interpretéiert ginn!

Ganz vill Observateure ginn och dovunner aus, datt sech de Conseil mat grousser Wahrscheinlechkeet guer net wäert drun halen. Et ass gewosst, datt de Jean-Claude Juncker eigentlech vill méi um Poste vum Här Van Rompuy intresséiert ass, dat heescht e wëll vill léiwere Conseilspresident ginn. An d'Staats- a Regierungschef kéinten him dee Gefale maachen. Direkt no den Europawale kommen se zesumme fir ebe grad déi Decisioun ze huelen - an d'Europäesch Vollekspartei huet op eemol, wéi duerch en Zauber, kee Spëtzekandidat méi fir de Poste vum President vun der Europäescher Commissioun ze iwwerhuelen.

A wat geschitt, falls d'EVP d'Europawale gewënnt? Da kann si sech ebe fir iergenden anere Politiker entscheiden. A wien huet d'Soen an der EVP? Keng aner ewéi d'Mme Merkel, déi schon nees géif iwwert alles decidéieren, wat an der Europäescher Unioun geschitt!

Esou einfach kann een de Wieler beléien!



Viviane Reding Bedrug um Wieler virgeheit, well si jo als Kommissäarin net manner ewéi zwee Mol genee dat gemaach huet!

Natierlech ass och d'ADR der Meenung, datt et trotz de ville schlechten Decisiounen, déi de fréiere Premier geholl huet, fir eist Land net onbedéngt schlecht wier, wann e Lëtzebuerger

De Walprogramm vun  
der ADR fir d'Europawale  
fannt Dir op  
[www.adr.lu](http://www.adr.lu)  
(franséisch a  
lëtzebuergesch Versioun)



Le programme électoral  
de l'ADR pour les  
élections européennes  
se trouve sur  
[www.adr.lu](http://www.adr.lu)  
(version française et  
luxembourgeoise)

**de Pefferkär**

Oplag: 223 000 Stéck

Verantwortlech fir dës Pefferkär ass:  
Alternativ Demokratesch Reformpartei  
20, rue de l'Eau  
L-1449 Lëtzebuerg



# EU-Agrarpolitik: keng gutt Bilanz!

Den Agrarsector ass zënter den Ufankszäite vum gemeinsamen Europa en Hauptbestanddeel vun der europäescher Politik. Zil war deemols, eng sécher Liewensmëttelversuergung vun der europäescher Populatioun ze erreechen an de Bauerebetriber e gerecht Akommes fir hir Arbecht zoukommen ze loossen.

Wa mer no 50 Joer gemeinsamer Agrarpolitik eng Bilanz zéien, da gesäit déi net gutt aus. Zwar ass d'Liewensmëttelversuergung vun der europäescher Populatioun haut méi ewéi garantéiert, zwar huet de Konsument eng enorm Auswiel vun héichwäertege Produkter zu

historesch niddrege Präisser (den Undeel vun den Depensé fir Liewensmëttel ass vu 40 op ronn 10 Prozent vum Akommes zréckgaangen), mä villes ass dobäi op der Streck bliwwen.

Mir hunn haut, mat Hëllef vun der Europäescher Agrarpolitik, eng héich modern, techniséiert a käschtenintensiv Landwirtschaft. Déi wéineg Betriber, déi dës Entwécklung iwwerlieft hunn, hu missen enorm Investissementer maachen, net wéineg vun hinnen hu sech ganz vill Schold opgelueden an déi wéineg Leit, déi an dës Betriber schaffen, stinn ënner engem enormen Arbechtsdruck.

D'landwirtschaftlecht Akommes steet awer a kengem Verhältnes zu deene gewaltegen Investissementer an där viller Aarbecht, déi an deene meeschte Betriber op eng 70-Stonnewoch erausleeft. An esouguer finanziell gesond Betriber halen op, well déi jonk Generatioun net bereet ass, ënner deene Konditiounen weiderzefueren.

Dat gewaltegt Bauerestierwe vun deene leschte Joerzénge ass aus ville Grënn net gutt. De Baueren- a Wénzerstand war ëmmer e wichtege Stabilitéitsfacteur an eiser Gesellschaft. An eng méi grouss Zuel vu mëttelgrousse Betriber bedeit a Krisenzäite méi Secherheet fir d'Liewensmëttelversuergung wéi eng industrialiséiert Landwirtschaft mat wéinegen, héich spezialiséierten, awer ufällege Betriber.

Dee gewaltegen Arbechtsdruck, deen op der Bauren- a Wénzerpopulatioun läit, gëtt nach verstärkt duerch de ganze bürokratesche Wouscht, deen haaptsächlech vu Bréssel ordonnéiert ginn ass, an zu Lëtzebuerg mat enger Beflissenheet sonnergläichen ëmgesat gëtt.

Leider hu verschidde Liewensmëttelskandalen, fir déi d'Baueren net verantwortlech sinn, besser Kontrollen néideg gemaach. Awer dat, wat de Baueren- a Wénzerbetriber hautdesdaags un administrativem Opwand zougemuut gëtt, ass net méi ze veräntweren. Konsumenteschutz an Ëmweltschutz an Eieren, mä hei gëtt et héich Zäit, datt déi Paperassen op den absolut néidege Minimum zréckgefouert ginn. Duerfir wäert d'ADR sech zu Stroossbuerg an zu Bréssel staark maachen!



----- ausschneiden an un d'ADR 20, rue de l'Eau L-1449 Lëtzebuerg schécken -----



**Gitt Member an der ADR, a frot och Är Familljememberen a Frënn, fir Member ze ginn.**

De Joresbäitrag ass fir eng Persoun 14.-€, fir e Stot 20.-€, a fir Schüler a Studenten 5.-€

Numm & Virnumm: .....

Adress: .....

Telefon: .....

Email: .....



**Gast Gibéryen**

Deputéierten  
Éierebuergermeeschter Fréiseng  
Éierepresident NGL



**Fernand Kartheiser**

Deputéierten  
Diplomat  
fréieren Arméioffizéier



**Roby Mehlen**

Éierendeputéierten  
Éierepresident ADR  
Éierepresident FLB  
Gemengeconseiller Manternach



**Liliana Miranda**

ADR-Generalsekretärin  
Attachée parlementaire  
Fréier Journalistin



**Roy Reding**

Deputéierten  
Affekot  
Vize-President ADR  
Presentateur Emissioun *Vu Fall*  
*zu Fall*



**Jean Schoos**

Déierendokter  
ADR-Nationalpresident  
President AMVL  
Member Opsiichtsrot Convis